

古調十六首

登司馬錯故城

主昭王命錯征五溪蠻城在武陵沅江南

將軍將秦師西南莫遐服故壘清江上蒼煙晦喬木

登臨值蕭辰周覽壯前躅塹平陳葉滿墉高秋蔓綠

發井抽寒菜毀臺生櫓穀耕人得古器宿雨多遺鏃

楚塞鬱重疊蠻溪紛詰曲留此數仞基幾人傷遠目

卧病聞常山旋師策勳宥過王澤大洽因

寄李六侍御

寂寂重寂寂病夫卧秋齋夜蟲思幽壁槁葉鳴空階

南國異氣候火旻尚昏霾瘴烟跼飛羽沴氣傷百骸
昨聞凱歌旋飲至酒如淮無戰陋丹水垂仁經藁街
清廟既策勲圓丘俟燔柴車書一以混幽遠靡不懷
逐客顛顛久故鄉雲雨乖禽魚各有化予欲問齊諧

謁枉山會禪師

我本山東人平生多感槩弱冠遊咸京上書金馬外
結交當世賢馳聲溢四塞勉修貴及蚤徂捷不知退
錙銖揚芬馨尋尺招瑕類淹留郢南鄙摧積羽翰碎
安能咎往事且欲去沈痾吾師得真如自在人寮內
哀我墮名網有如翔飛輩瞳瞳揭智炬照使出昏昧
靜見玄關啓歆然初心會夙尚一何微今得信可大
覺路明證入便門通懺悔悟理言自忘處也道猶泰
色身豈吾寶慧性非形礙思此靈山期未來何年載

善卷壇下作

在枉山上

先生見堯心相與去九有斯民既已治我得安林藪
道為自然貴名是無窮壽瑤壇在此山識者常回首

武陵觀火詩

楚鄉祝融分災火常為虞是時直突烟發自晨炊徒
盲風扇其威白晝燠陽烏操綆不暇汲循墻竄避踰
怒如列缺光迅與焚輪俱聯延掩四達赫弈成洪鑪

洵疑雲濤翻颯若鬼神趨當前迎歛艷是物同膏腴
金鳥入梵天赤龍遊玄都騰烟透窓戶飛焰生樂櫺
火山摧半空星雨灑中衢瑤壇被髹漆寶樹攢珊瑚
花縣與琴焦旗亭無酒濡市人委百貨邑令遺雙鳧
餘勢下隈隩長標烘舳舻吹熒照水府炙浪愁天吳
災罷雲日晚心驚視聽殊高灰辨廩庾黑土連闔閭
衆燼合星羅遊氛鑠人膚厚地蔽宿熱遙林呈驟枯
火德資生人庸可一日無御之失其道敲石彌天隅
晉庫走龍劍吳宮傷燕雛五行有沴氣先哲垂訖謨
宋鄭同日起時當賢大夫無苛自可樂弭患非所圖

賢守恤人瘼臨烟駐驪駒弔傷色慘怛言失詞劬愉
下令蠲里布指期輕市租閉垣適未立苦蓋自相娛
山木行翦伐江泥宜堽塗魯臣不必葺何用徵越巫

崔元受少府自貶所還遺山薑花以詩答之

故人博羅尉遺我山薑花彩從碧海上來自謫僊家
雲濤潤孤根陰火照晨葩淨搖扶桑日豔對瀛洲霞
世人愛芳辛舉擷忘幽遐傳名入帝里飛駟辭天涯
王濟本尚味石崇方鬪奢雕盤多不識綺席乃增華
驛馬損筋骨貴人滋齒牙願予藜藿士持此空嘆嗟

途中蚤發

馬踟塵上霜月明岡頭路行人朝氣銳宿鳥相辭去
流水隔遠村縵山多紅樹悠悠關塞內來往無閑步

和董庶中古散調詞贈尹果毅

昔聽東武吟壯年心已悲如何今渡落聞君苦辛辭
言有窮巷士弱齡頗尚竒讀得玄女符生當事邊時
借名遊俠窟結客幽并兒往來長楸間能帶雙韃馳
崩騰天寶末塵暗燕南垂燿火入咸陽詔徵神武師
是時占軍募挿羽揚金羈萬夫列轅門觀射中戟支
誓當雪國讐親愛從此辭中宵倚長劔起視蚩尤旗
介馬晨蕭蕭陳雲竟天涯陰風獵白草旗檠光參差

勇氣貫中腸視身忽如遺曾擒白馬將虜騎不敢追

貴臣上戰功名姓隨意移終歲肌骨苦他人印纒纒
謁者既清宮諸侯各罷戲上將賜北第門戟不可窺
背血下沾襟天高問無期却尋故鄉路孤影空相隨
行逢里中舊樸遼昔所嗤一言合侯王膏佩黃金龜
問我何自苦可憐真數竒遲回顧徒御得色懸雙眉
翻然悞世途撫已昧所宜田園已蕪沒流浪江海湄
鷲禽毛翮摧不見翔雲姿哀容蔽逸氣孑孑無人知
寂寞草玄徒長吟下書帷為君發哀韻若扣瑤林枝
有客識其真潺湲涕交頤勸爾一杯酒陶然足自怡

望衡山

東南倚蓋卑維嶽資柱石前當祝融居上拂朱鳥翮
青冥結精氣磅礴宣地脉還聞膚寸陰能致彌天澤

遊柅源一百韻

沅江清悠悠連山鬱岑寂回流抱絕巘皎鏡含虛碧
昏旦遞明媚烟嵐紛委積香蔓垂綠潭暴龍照孤磧
山下潭名綠蘿磧名暴龍淵明著前志子驥思遠跡子驥事見陶
寂寂無何鄉密爾天地隔金行太元歲漁者偶探贖
尋花得幽蹤窺洞穿閭隙依微聞雞犬豁達值阡陌
居人互將迎笑語如平昔廣樂雖交奏海禽心不悻

揮手一來歸故溪無處覓懸絲五百載市朝幾遷華

有路在壺中無人知地脉皇家感至道聖祚自天錫

金闕傳本枝玉函留寶曆禁山開祕宇復戶潔靈宅

詔隸二十戶免徭以奉灑掃藥檢香氣氤醮壇烟暮暮我來塵外

躅瑩若朝醒析崖轉對翠屏水窮留畫鷁三休俯喬

木千級攀峭壁旭日聞撞鐘綵雲迎躡屐遂登最高

頂縱目還楚澤平湖見草青遠岸連霞赤幽尋如夢

想絲思屬空閒寅緣且忘疲耽玩近成癖清猿伺曉

發瑤草陵寒坼祥禽舞葱蘢珠樹搖玃璫羽人顧我

笑勸我稅歸輓霓衣何飄颻童顏潔白誓重巖是潘

屏馴鹿受羈勒樓居邇清霄蘿萬成翠帟仙翁遺竹
杖王母留桃核姹女飛丹沙青童護金液寶氣浮鼎
耳神光生劔脊虛無天樂來僊宰鬼兵役丹丘肅朝
禮玉札五紬繹枕中淮南方牀下阜鄉烏明鑑坐遙
夜幽籟聽浙瀝因話近世僊聳然心神惕乃言瞿氏
子骨狀非凡格往事黃先生群兒多侮劇警然不屑
意元氣貯肝馬往往遊不歸洞中觀博奕言高未易
信猶復加訶責一旦前致辭自云仙期迫言師有道
骨前事嘗被謫如今三山上名字在真籍悠然謝主
人後歲當來覲言畢依庭樹如烟去無迹觀者皆失

次驚追紛絡繹日莫山逕窮松風自蕭槭適逢修蛇
見瞑目光激射如嚴三清居不使恣搜索唯餘步綱
勢八趾在沙礫至今東北隅表以壇上石列仙徒有
名世人非目擊如何庭廡際白日振飛翮洞天豈幽
遠得道如咫尺一氣無死生三光自遷易因思人間
世前路何湫窄瞥然此生中善祝期滿百大方播群
類秀氣肖翕闢性靜本同和物牽成阻阨是非關方
寸葷血昏精魄遂令多天傷猶喜見斑白喧喧車馬
馳苒苒桑榆夕共安緹繡榮不悟泥途適紛吾本孤
賤世業在逢掖九流宗指歸百氏旁攬掖公卿偶慰

薦鄉曲謬推擇居安白社貧志傲玄纁辟功名希自
取簪組俟揚歷書府蚤懷鈇射宮會發的起草香生
帳坐曹烏集柏賜宴聆簫韶侍祠閱琮璧嘗聞履忠
信可以行蠻貊自迷希古心妄恃干時畫巧言忽成
錦苦志徒食藥平地生峯巒深心有矛戟曾波一震
盪弱植果淪溺北渚弔靈均長岑思亭伯禍來昧幾
兆事去空歎惜塵累與時深流年隨漏滴才能疑木
鴈報施迷夷跖楚奏繫鍾儀商歌勞甯戚稟生非懸
解對境方感激自從嬰網羅每事問龜策王正降雷
雨環玦賜遷斥儻復夷平人誓將依羽客買山構精

舍領徒開講席冀無身外憂自有閑中益道牙期日
就塵慮乃冰釋且欲遺姓名安能慕竹帛長生尚學
致一溉豈虛擲芝朮資糗糧煙霞拂巾幘黃石履看
墮洪崖肩可拍聊復嗟蜉蝣何頻哀虺蜴青囊既深
味瓊葩亦屢摘縱無西山姿猶免長戚戚

客有為余話登天壇遇雨之狀因以賦之

清晨登天壇半路逢陰晦疾行穿雨過却立視雲背
白日照其上風雷走于內澗瀆雪海翻槎牙玉山碎
蛟龍露鬚鬣神鬼含變態萬狀互相生百音以繁會
俯觀群動靜始覺天宇大山頂自激明人間已濤霽

豁然重昏歛渙若春冰潰反照入松門瀑流飛縞帶
遙光泛物色餘韻吟天籟洞府撞仙鍾村墟起夕靄
却見山下侶已如迷世代問我何處來我來雲雨外
有僧言羅浮事因為詩以寫之

君言羅浮上容易見九垓漸高元氣壯洶湧來翼身
夜宿最高峯瞻望浩無鄰海黑天宇曠星辰來逼人
是時當朏魄陰物恣騰振日光吐鯨背劍影開龍鱗
倏若萬馬馳旌旗聳齋淪又如廣樂奏金石含悲辛
疑其有巨靈怪物盡來賓陰陽迭用事乃俾夜作晨
咿喔天雞鳴扶桑色昕昕赤波千萬里踴出黃金輪
下視生物息霏如隙中塵醢雞仰鸞口亦謂雲漢津
世人信耳目方寸度大鈞安知視聽外怪愕不可陳
悠悠想大方此乃杯水濱知小天地大安能識其真

秋江蚤發

輕陰迎曉日霞霽秋江明草樹含遠思襟懷有餘清
凝睇萬象起朗吟孤憤平渚鴻未矯翼而我已遐征
因思市朝人方聽晨雞鳴昏昏戀衾枕安見元氣英
納爽耳目變玩竒筋骨輕滄洲有竒趣浩蕩吾將行
裴祭酒尚書見示春歸城南青松塢別墅
寄王左丞高侍郎之什命同作

蚤宦閱人事晚懷生道機時從學省出獨望郊園歸
野約度春水山花映巖扉石頭解金章林下步綠薇
青松鬱成塢修竹盈尺圍吟風起天籟蔽日無炎威
危逕盤羊腸連甍聳鸞翬飛幽谷響樵斧澄潭環釣磯
因高見帝城冠蓋揚光輝白雲難持寄清韻投所希
二公如長離比翼翔太微含情謝林壑酬贈駢珠璣
願予久郎潛愁寂對芳菲一聞丘中趣再撫黃金微
和河南裴尹侍郎宿齋太平寺詣九龍祠
祈雨二十韻

有事九龍廟繫齋梵王祠玉簫何時絕碧樹空涼颼

吏散埃壘息月高庭宇宜重城肅湯閉澗水潺湲時

人稀夜復閑慮靜境亦隨紈懷斷鼇足凝想乘鸞姿
朱明盛農節膏澤方愆期瞻言五靈瑞能救百穀萎
咿喔晨雞鳴闌干斗柄垂修容謁神像注意陳正詞
驚颿起泓泉若召雷雨師黑烟聳鱗甲灑液如芬絲
豐隆震天衢列缺揮火旗炎空忽淒緊高雷懸便縻
生物已霽霈濕雲稍離披丹霞啓南陸白水含東菑
熙熙飛走適藹藹草樹滋浮光動宮觀遠思盈川坻
吳公敏於政謝守工為詩商山有病客言賀舒厖眉
冬夜宴河中李相公中堂命筵歌送酒

朗朗鳴鷄弦華堂夜多思簾外雪已深坐中人半醉
翠娥發清響曲盡有餘意酌我莫憂狂老來無逸氣

劉賓客文集卷第二十三

劉賓客文集卷第二十四

七言五十六首

西塞山懷古

西晉樓船下益州金陵王氣漠然收千尋鐵鎖沈江
底一片降幡出石頭人世幾回傷往事山形依舊枕
寒流今逢四海為家日故壘蕭蕭蘆荻秋

陽山廟觀賽神梁松南征至此遂為其神在朗州

漢家都尉舊征蠻血食如今配此山曲蓋幽深蒼檜
下洞簫愁絕翠屏間荆巫脉脉傳神語野老婆娑啓
醉顏日落風生廟門外幾人連蹋竹歌還

漢壽城春望

古荊州刺史治亭其下有子胥廟兼楚王故墳

漢壽城邊野草春
荒祠古墓對荆榛
田中牧豎燒芻狗
陌上行人看石麟
華表半空經霹靂
碑文纔見滿埃塵
不知何日東瀛變
此地還成要路津

後梁宣明二帝碑堂下作

玉馬朝周從此辮
園陵寂寞對豐碑
千行宰樹荊州道
莫雨蕭蕭聞子規

荊州道懷古

南國山川舊帝畿
宋臺梁館尚依稀
馬嘶古樹行人歇
麥秀空城澤雉飛
風吹落葉填官井
火入荒陵化寶衣
徒使詞臣庾開府
咸陽終日苦思歸

朗州賓員外見示與澧州元郎中郡齋贈

荅長句二篇因而繼和

鴛鴦差池出建章
綵旗朱戶鬱相望
新恩共理犬牙地
昨日同含雞舌香
白芷江邊分驛路
山桃溪外接甘棠
應憐一罷金閨籍
枉渚逢春十度傷

蚤春對雪奉寄澧州元郎中

新賜魚書墨未乾
賢人暫屈遠人安
朝驅旌旆行時令
夜見星辰憶舊官
梅蘂覆階鈴閣煥
雪峯當戶戟枝寒
寧知楚客思公子
北望長吟澧有蘭

寶朗州見示與澧州元郎中蚤秋贈荅命

同作

鄰境諸侯同舍郎
芷江蘭浦限無梁
秋風門外旌旗動
曉露庭中橘柚香
玉簟微涼宜白晝
金笳入莫應清商
騷人昨夜聞題鵠
不歎流年惜衆芳

衢州徐員外使君遺以縞紵兼竹書箱因

成一篇用荅佳貺

按此郡本自婺州析置徐自台州遷

爛柯山下舊仙郎
列宿來添婺女光
遠放歌聲分白紵
紵知傳家學與青箱
水朝滄海何時去
蘭在幽林亦自芳
聞道天台有遺愛
人將琪樹比甘棠

唐秀才贈端州紫石硯以詩荅之

端州石硯人間重
贈我應知正草玄
闕里廟中空舊物
開方竈下豈天然
玉螭吐水霞光靜
綵翰搖風絳錦鮮
此日慵工記名姓
因君數到墨池前

覽董評事思歸之什因以詩贈

幾年油幕佐征東
却泛滄浪狎釣童
歌枕醉眠成戲蝶
抱琴閑望送歸鴻
文儒自襲膠西相
倚伏能齊塞上翁
更說扁舟動鄉思
青菰已熟柰秋風

松滋渡望硤中

渡頭輕雨灑寒梅
雲際溶溶雪水來
夢渚草長迷楚

望夷陵土黑有秦灰巴人淚應猿聲落蜀客舩從鳥
道回十二碧峯何處所永安宮外是荒臺

揚州春夜李端公益張侍御登段侍御平
仲密縣李少府暘秘書張正字復元同會
於水館對酒聯句追刻燭擊銅鉢故事遲
輒舉觥以飲之逮夜艾群公沾醉紛然就
枕余偶獨醒因題詩於段君枕上以志其
事

寂寂獨看金燼落紛紛只見玉山頽自羞不是高陽
侶一夜星星騎馬回

逢王十二學士入翰林因以詩贈

王以藍田尉充學士

廐馬翩翩禁外逢星槎上漢杳難從定知欲報淮南
詔促召王褒入九重

關下口號呈柳儀曲

綵仗神旗獵曉風雞人一唱鼓蓬蓬銅壺漏水何時
歇如此相催即老翁

監祠夕月壇書事

其禮周書

西皞司分晝夜平羲和亭午太陰生鏗鏘揖讓秋光
裏觀者如雲出鳳城

戲贈崔千牛

學道深山虛老人，留名萬代不關身。
勸君多買長安酒，南陌東城占取春。

元和甲午歲詔書盡徵江湘逐客，余自武陵赴京宿於都亭，有懷續來諸君子。

雲雨江湘起，卧龍武陵樵。客躡仙蹤，十年楚水楓林下。今夜初聞長樂鍾。

江陵嚴司空見示與成都武相公唱和因

命同作

南荆西蜀大行臺，幕府旌門相對開。名重三司平水土，威雄八陳役風雷。彩雲朝望青城起，錦浪秋經白帝來。不是郢中清唱發，誰當丞相掞天才。

徵還京師見舊番官馮叔達

前者忽忽襍被行，十年顛顛到京城。南宮舊吏來相問，何處淹留白髮生。

故洛城古牆

粉落椒飛知幾春，風吹雨灑旋成塵。莫言一片危基在，猶過無窮來往人。

元和十一年自朗州承召至京戲贈看花諸君子

紫陌紅塵拂面來無人
不道看花回玄都觀裏
桃千樹盡是劉郎去後栽

再遊玄都觀絕句 并引

余貞元二十一年為屯田員外郎時此觀未有花是歲出牧連州尋貶朗州司馬居十年召至京師人人皆言有道士手植仙桃滿觀如紅霞遂有前篇以志一時之事旋又出牧今十有四年復為主客郎中重遊玄都蕩然無復一樹唯兔葵燕麥動搖於春風耳因再題二十八字以俟後遊時大和二年三月

百畝中庭半是苔
桃花淨盡菜花開
種桃道士歸何處
前度劉郎今獨來

望夫石 正對和州郡樓

終日望夫夫不歸
化為孤石苦相思
望來已是幾千載
只似當時初望時

金陵五題 并引

余少為江南客而未遊秣陵嘗有遺恨後為歷陽守
跂而望之適有客以金陵五題相示道爾生思歛然
有得他日友人白樂天掉頭苦吟歎賞良久且曰石
頭詩云潮打空城寂寞回吾知後之詩人不復措詞
矣餘四詠雖不及此亦不孤樂天之言爾

石頭城

山圍故國周遭在，潮打空城寂寞回。
淮水東邊舊時月，夜深還過女牆來。

烏衣巷

朱雀橋邊野草花，烏衣巷口夕陽斜。
舊時王謝堂前鷺，飛入尋常百姓家。

臺城

臺城六代競豪華，結綺臨春事最奢。
萬戶千門成野草，只緣一曲後庭花。

生公講堂

生公說法鬼神聽，身後空堂夜不扃。
高坐寂寥塵漠漠，一方明月可中庭。

江令宅

南朝詞臣北朝客，歸來唯見秦淮碧。
池臺竹樹三畝餘，至今人道江家宅。

謝寺雙檜

揚州法雲寺謝鎮西宅古檜存焉

雙檜蒼然古貌奇，含烟吐霧鬱參差。
晚依禪客當金殿，初對將軍映畫旗。
龍象界中成寶蓋，鴛鴦瓦上出高枝。
長明燈是前朝焰，曾照青青年少時。

韓信廟

將略兵機命世雄
蒼黃鍾室歎良弓
遂令後代登壇者
每一尋思怕立功

秋夜安國觀聞笙

織女分明銀漢秋
桂枝梧葉共颼颼
月露滿庭人寂寂
霓裳一曲在高樓

洛中寺北樓見賀監草書題詩

高樓賀監昔曾登
壁上筆蹤龍虎騰
中國書流讓皇象
北朝文士重徐陵
偶因獨見空驚目
恨不同時便伏膺
唯恐塵埃轉磨滅
再三珍重囑山僧

聞韓賓擢第歸觀以詩美之兼賀韓十五曹長時韓牧永州

零陵香草滿郊垌
丹穴雛飛入翠屏
孝若歸來呈畫讚
孟陽別後有山銘
蘭陔舊地多纒結
桂樹新枝色更青
為報儒林丈人道
如今從此鬢星星

寄楊八壽州

風獵紅旗入壽春
滿城歌舞向朱輪
八公山下清淮水
千騎塵中白面人
桂嶺雨餘多鶴迹
茗園晴望似龍鱗
聖朝方用敢言者
次第應須舊諫臣

李賈二大諫拜命後寄楊八壽州

諫省新登二直臣
萬方驚喜捧絲綸
則知天子明如

日肯放淮陽高卧人

宣上人遠寄賀禮部王侍郎放榜後詩因而繼和

禮闈新榜動長安九陌人人走馬看一日聲名徧天下滿城桃李屬春官自吟白雪銓詞賦指示青雲借羽翰借問至公誰印可支郎天眼定中觀

贈東岳張鍊師

東岳真人張鍊師高情雅澹世間希堪為烈女書青簡久事元君住翠微金縷機中拋錦字玉清壇上著霓衣雲衢不要吹簫伴只擬乘鸞獨自飛

秘書崔少監見示墜馬長句因而和之

麟臺少監舊仙郎洛水橋邊墮馬傷塵汗晉間青蓋綬風飄掌上紫遊韉上車著作應來問折臂三公定送方猶賴德全如醉者不妨吟詠入篇章

寄楊虢州與之舊姻

避地江湖知幾春今來本郡擁朱輪阮郎無復里中舊楊僕却為關外人各繫一官難命駕每懷前好易沾中玉城山裏多靈藥擺落功名且養神

秋日題寶負外崇德里新居

實時荆
度支案

長愛街西風景閑到君居處暫開顏清光門外一渠

水秋色牆頭數點山疎種碧松通月朗多栽紅藥待
春還莫言堆案無餘地認得詩人在此間

蒙恩轉儀曹郎依前充集賢學士舉韓湖
州自代因寄七言

翔鸞關下謝恩初通籍由來在石渠暫入南宮判祥
瑞還歸內殿閱圖書故人猶在三江外同病凡經二
紀餘今日薦君嗟久滯不唯文體似相如

途次華州陪錢大夫登城北樓春望因覩
李崔令狐三相國唱和之什翰林舊侶繼

踵華城山水清高鸞鳳翔集皆忝夙春遂
題是詩

城樓四望出風塵見盡關西渭北春百二山河雄上
國一雙旌旆委名臣壁中今日題詩處天上同時草
詔人莫怪老郎呈濫吹官途雖別舊情親

三鄉驛樓伏覩玄宗望女几山詩小臣斐
然有感

開元天子萬事足唯惜當時光景促三鄉陌上望仙
山歸作霓裳羽衣曲僊心從此在瑤池三清八景相
追隨天上忽乘白雲去世間空有秋風詞

洛下初冬拜表有懷上京故人

鳳樓南面控三條拜表郎官蚤渡橋清洛曉光鋪碧
輦上陽霜葉翦紅綃省門簪組初成列雲路鴛鴦想
退朝寄謝殷懃九天侶槍榆水擊各逍遙

尉遲郎中見示自南遷牽復却至洛城東
舊居之作因以和之

曾遭飛語十年謫新受恩光萬里還朝服不妨遊洛
浦郊園依舊看高山竹含天籟清商樂水遶庭臺碧
玉環留作功成退身地如今只是暫時閑

洛中酬福建陳判官見贈

潦到聲名擁腫材一生多故苦遭迴南宮舊籍遙相
管東洛閑門晝未開靜對道流論藥石偶逢詞客與
瓊瑰怪君近日文鋒利新向延平看劍來

始聞秋風

昔看黃菊與君別今聽玄蟬我却回五夜颼颼枕前
覺一年顏狀鏡中來馬思邊草拳毛動鷗盼青雲睡
眼開天地肅清堪四望為君扶病上高臺

和蘇十郎中謝病閑居時嚴常侍蕭給事
同過訪歎初有二毛作

清羸隱几望雲空左掖鴛鴦到室中一卷素書銷永
日數莖斑鬢對秋風菱花照後容雖改蒼草占來命

已通莫怪人人驚
蚤白緣君合是黑頭翁

訓淮南廖參謀秋夕見過之作揚州公昔為揚州從事

參謀從釋子反初服

揚州從事夜相尋
無限新詩月下吟
初服已驚玄髮長
高情猶向碧雲深
語餘時舉一椀酒
坐久方聞數處砧
不逐繁華訪閑散
知君擺落俗人心

題王郎中宣義里新居

愛君新買街西宅
客到如遊鄆杜間
雨後退朝貪種樹
申時出省趁看山
門前巷陌三條近
牆內池亭萬境閑
見擬移居作隣里
不論時節請開關

訓郎州崔負外與任十四兄侍御同過

人舊居見懷之什時守吳郡

昔日居鄰招屈亭
楓林橘樹鷓鴣聲
一辭御苑青門去
十見蠻江白芷生
自此曾沾宣室召
如今又守闔閭城
何人萬里能相憶
同舍仙郎與外兄

外南宮同官

任侍御子外兄崔負

美温尚書鎮定興元以詩寄賀

旌旗入境犬無聲
戮盡鯨鯢漢水清
從此世人開耳目
始知名將出書生

劉駙馬水亭避暑

千竿竹翠數蓮紅水閣虛涼玉簟空琥珀琰烘疑漏
酒水精簾瑩更通風賜冰滿盃沈朱實法饌盈盤覆
碧籠盡日逍遙避煩暑再三珍重主人翁

述舊賀遷寄陝虢孫常侍兩宮左輔兩處交代

南宮幸襲芝蘭後左輔曾交印綬來多病未離清洛
苑新恩已歷望仙臺關頭古塞桃林靜城下長河竹
箭回聞道隨車有零雨此時偏動子荆才

訓端州吳大夫夜泊湘川見寄一絕

夜泊湘川逐客心月明猿苦血沾襟湘妃舊竹痕猶

淺從此因君染更深

卷第二十四

劉賓客文集卷第二十五

雜體三十九首

翠微寺有感

吾王昔遊幸離宮雲際開朱旗迎夏畢涼軒避暑來
湯甃賜都尉寒冰頌上才龍顛不可望玉坐生浮埃
連州臘日觀莫徭獵西山

海天殺氣薄蠻軍部伍囂林紅葉盡變原黑草初燒
圍合繁鉦息禽興大旆搖張羅依道口嗾犬上山腰
猜鷹慮奮迅驚麇時跼跳瘴雲四面起臘雪半空銷
箭頭餘鵠血鞍傍見雉翹日莫還城邑金笳發嚴譙

觀舞柘枝二首

胡服何葳蕤，僊僊登綺墀。神飈獵紅蕖，龍燭然金枝。
垂帶覆纖腰，安鈿當嫵眉。翹袖中繁鼓，傾眸遡華棖。
燕餘有舊曲，淮南多冶詞。欲見傾城處，君看赴節時。
山雞臨清鏡，石燕赴遙津。何如上客會長袖，入華茵。
體輕似無骨，觀者皆聳神。曲盡回身去，曾波猶注入。

君山懷古

屬車八十一，此地阻長風。千載威靈盡，赭山寒水中。

秋江晚泊

長泊起秋色，空江涵霽暉。莫霞十萬狀，宿鴻次第飛。
古戍見旗迥，荒村聞犬稀。軒峨船上客，勸酒夜相依。
步出武陵東，亭臨江寓望。

鷹至感風候，霜餘變林麓。孤颿帶日來，寒江轉沙曲。
戍遙旗影動，津晚榜聲促。月上綵霞收，漁歌遠相續。

秋日送客至潛水驛

候吏立沙際，田家連竹溪。神林社日鼓，茅屋午時雞。
雀噪晚禾地，蝶飛秋草畦。驛樓宮樹近，疲馬再三嘶。
晚歲登武陵城，顧望水陸。悵然有作。

星象承鳥翼，蠻陬想犬牙。俚人祠竹節，仙洞開桃花。
城基歷漢魏，江源自賈巴。華表廖立墓，菜地黃瓊家。

霜輕菊秀晚石淺水文斜樵音遠故壘汲路明寒沙
清風稍改葉盧橘如含葩野橋鳴驛騎叢祠發迥笳
跳鱗避舉網倦鳥寄行查路塵高出樹山火遠連霞
夕曛轉赤岸浮藹起蒼葭軋軋渡溪漿連連赴林鴟
叫閤道非遠賜環期自賒孤臣本危涕喬木在天涯
湖州崔郎中曾長寄三癖詩自言癖在詩
與琴酒其詞逸而高吟詠不足昔柳吳興
亭臯隴首之句王融書之白團扇故爲四
韻以謝之

視事畫屏中自稱三癖翁管絃泛春渚旌旆拂晴虹
酒對青山月琴韻白蘋風會書團扇上知君文字工
爲郎分司寄上都同舍

藉通金馬門身在銅駝陌省闈晝無塵宮樹遠凝碧
荒街淺深轍古渡潺湲石唯有嵩丘雲堪誇蚤朝客
登陝州城北樓卻寄京師親友

獨上百尺樓日窮思亦愁初日徧露草野田荒悠悠
塵息長道白林清宿烟收回首雲深處永懷帝鄉遊
請告東歸發灞橋卻寄諸僚友

征途出灞溪回首傷如何故人雲雨散滿目山川多
行車無停軌流景同迅波前歡漸成昔感歎益勞歌

聖神武手握玄符平九土初哀狂童襲故事文告不
來方震怒去秋詔下誅東平官軍四合猶嬰城春來
群鳥噪且驚氣如壞山墮其庭牙門大將有劉生夜
半射落撓槍星帳中虜血流滿地門外三軍舞連臂
駟騎函首過黃河城中無賊天氣和朝庭侍郎來慰
撫耕夫滿野行人歌

泰山沈寇六十年旅祭不饗生愁烟今逢聖君欲封
禪神使陰兵來助戰祆氛掃盡河水清日觀杲杲卿
雲見開元皇帝東封時百神受職爭奔馳千鈞猛箴
順流下洪波涵淡浮熊羆侍臣燕公秉文筆玉檢告
天無愧詞當今虜孫承聖祀岳神望幸河宗舞青門
大道屬車塵共待歲蕤翠舉

城西行

城西簇簇三叛族叛者為誰蔡吳蜀中使提刀出禁
來九衢車馬轟成雷臨刑與酒柸未覆仇家白官先
請肉守吏能然董卓臍饑烏來覘相玄目城西人散
黍街平雨洗血痕春草生

武昌老人說笛歌

武昌老將七十餘手把庾令相問書自言少小學吹
笛蚤事曹王曾賞激往年鎮戍到蘄州楚山蕭蕭笛

竹秋當時買林恣搜索典卻身上烏貂裘古苔蒼蒼
封老節石上孤生飽風雪商聲五音隨指發水中龍
應行雲絕曾將黃鶴樓上吹一聲占盡秋江月如今
老去語猶遲音韻高低耳不知氣力已無心尚在時
時一曲夢中吹

西山蘭若試茶歌

山僧後檐茶數叢春來映竹抽新茸苑然為客振衣
起自傍芳叢摘鷹嘴斯須炒成滿室香便酌砌下金
沙水驟雨松聲入鼎來白雲滿盃花裴回悠揚噴鼻
宿程散青梢散骨頰襟開陽崖陰嶺各殊氣未若竹
下莓苔地炎帝雖嘗未解煎相君有錄那知味新芽
連拳半未舒自摘至煎俄頃餘木蘭墜露香微似瑤
草臨波色不如僧言靈味宜幽寂采采翹英為嘉客
不辭緘封寄郡齋甌井銅鑪損標格何況蒙山顧渚
春白泥赤印走風塵欲知花乳清冷味須是眠雲跂
石人

廟庭偃松詩并引

侍中後閣前有小松不待年而偃丞相晉公為賦詩
美其猶龍蛇然植于高檐喬木間上嶽旁軋盤蹙傾
亞似不得天和者公以遂物性為意乃加憐焉命畚

土以壯其趾使無歌索綯以牽其榦使不仆盥漱之
餘以潤之顧眄之輝以照之發於仁心感召和氣無
復天闕坐能敷舒鄉之跽感化為竒古故雖裘丈而
有偃號焉予嘗詣閣白事公為道所以且示以詩竊
感嘉木之逢時斐然成詠

勢軋枝偏根已危高情一見與扶持忽從顛顛有生
意卻為離披無俗姿影入巖廊行樂處韻含天籟宿
齋時謝公莫道東山去待取陰成滿鳳池

荅東陽于令涵碧圖詩并引

東陽令于興宗丞相燕國公之猶子生綺襦純袴間
所見皆貴盛而擊然有心如山東書生前年白有司
願為親民官以自效遂補東陽及莅官以簡易為治
故多暇日一旦於縣五里偶得竒境埋沒於翳蒼中
于生自以有特操而生於公侯家由覆蔭入仕常忽
忽歎息因移是心開挾泉石芟去蘿葛斧凡材畚息
壤而清溪翠巖森立全來因構亭其端題曰涵碧碧
流貫于庭中如青龍蜿蜒冰_去澈射人樹石雲霞列
于前昏旦萬狀惜其居地不得有聞於時故圖之來
乞詞既無負尤物予亦久翳蘿葛者睹之慨然遂賦
七言以貽後之文士

東陽本是佳山水何況曾經沈隱侯化得邦人解吟
詠如今縣令亦風流新開潭洞疑仙境遠寫丹青到
雖州落在尋常畫師手猶能三伏凜生秋

贈致仕滕庶子先輩

時及第人
中最長

朝服歸來畫錦榮登科記上更無名壽觴每使曾孫
獻勝境長攜衆妓行矍鑠據鞍時騁健殷勤把酒尚
多情陵寒卻向山陰去衣繡郎君雪裏迎

時令子為
御史主務

在越
中

詠樹红柿子

曉連星影出晚帶日光懸本因遺採掇翻自保天年

庭竹

露滌鈿粉節風搖青玉枝依依似君子無地不相宜

臺城懷古

清江悠悠王氣沈六朝遺事何處尋宮牆隱嶙圍野
澤鶴鷄夜鳴秋色深

題壽安甘棠館二首

公館似仙家池清竹逕斜山禽忽驚起衝落半巖花
門前洛陽道門裏桃源路塵土與烟霞其間十餘步

與歌者米嘉榮

唱得涼州意外聲舊人唯數米嘉榮近來時世輕先

輩好染頰須事後生

聽舊宮中樂人穆氏唱歌

曾隨織女渡天河記得雲間第一歌
休唱貞元供奉曲當時朝士已無多

渾侍中宅牡丹

徑尺千餘朵人間有此花
今朝見顏色更不向諸家
唐郎中宅與諸公同飲酒看牡丹

今日花前飲甘心醉數栝
但愁花有語不為老人開
與歌者何哉

二十餘年別帝京重聞天樂不勝情舊人唯有何哉
在更與殷勤唱渭城

與歌童田順郎

天下能歌御史娘花前月底奉君王
九重深處無人見分付新聲與順郎

燕尔館破屏風所畫至精人多歎賞題之
畫時應遇空亡日賣處難逢識別人
唯有多情往來

客強將衫袖拂埃塵

賞牡丹

庭前芍藥妖無格池上芙蓉淨少情
唯有牡丹真國色花開時節動京城

寄陝州姚中丞

時分司東都

八月天地肅二陵風雨收
旌旗闕下來雲日關東秋
禹跡想前事漢臺餘故丘
裴回襟帶地左右帝王州
留滯悲昔老恩光榮徹侯
相思望棠樹一寄商聲謳
奉酬湖州崔郎中見寄五韻

山陽昔相遇灼灼晨葩鮮
同遊翰墨場和樂埴篔簹
一落名宦途浩如乘風船
行當衰莫日卧理淮海壖
猶期謝病後共樂桑榆年

劉賓客文集卷第二十五

劉賓客文集卷第二十六

樂府上

團扇歌

團扇復團扇奉君清暑殿
秋風入庭樹從此不相見
上有乘鸞女蒼蒼網蟲遍
明年入懷袖別是機中練

荊州歌二首

渚宮楊柳暗麥城朝雉飛
可憐扇青伴乘煥著輕衣
今日好南風商旅相催發
沙頭檣竿上始見春江闊

紀南歌

風烟紀南城塵土荊門路
天寒多獵騎走上樊姬墓

宜城歌

野水遶空城行塵起孤驛荒臺側生樹石碣陽鐫額
靡靡度行人溫風吹宿麥

順陽歌

朝辭官軍驛前望順陽路野水齧荒墳秋蟲鏤官樹
曾聞天寶末胡馬西南騫城守魯將軍拔城從此去

馬嵬行

綠野扶風道黃塵馬嵬驛路邊楊貴人墳高三四尺
乃問里中兒皆言幸蜀時軍家誅佞倖天子捨妖姬

詳史伏門屏貴人牽帝衣低回轉美目風日為無暉

貴人飲金屑倏忽薜英莫平生服杏丹顏色真如故
屬車塵已遠里巷來窺覷共愛宿妝妍君王畫眉處
履綦無復有履組光未滅不見巖畔人空見陵波襪
郵童愛蹤跡私手解槃結傳看千萬眼縷絕香不歇
拍環照骨明首飾敵連城將入咸陽市猶得賈胡驚

視刀環歌

常恨言語淺不如人意深今朝兩相視脉脉萬重心

三閣辭四首 吳聲

貴人三閣上日晏未梳頭不應有恨事嬌甚卻成愁
珠箔曲瓊鈎子細見揚州北兵那得度浪語判悠悠

沈香帖閣柱金縷畫門楣回首降幡下已見黍離離
三人出督井一身登檻車朱門漫臨水不可見鱸魚

更衣曲

博山烟烟吐香霧紅燭引至更衣處夜如何其夜漫
漫鄰雞未鳴寒鴈度庭前雪壓松桂叢廊下點點懸
紗籠滿堂醉客爭笑語嘈噴琵琶青幕中

淮陰行五首

古有長干行言三江之事悉矣余嘗阻風淮陰作淮
陰行以裨樂府

簇簇淮陰市行樓綠岸上好日起檣竿烏飛鷺五兩
金日轉船頭金烏指西北烟波與春草千里同一色

船頭大銅鑲摩挲光陳陳蚤晚使風來沙頭一眼認
何物令儂羨羨郎船尾燕銜泥趁檣竿宿食長相見
隔浦望行船頭昂尾憶憶無柰挑菜時清淮春浪軟

競渡曲

競渡始於武陵至今舉檝而相和
之其音咸呼云何在斯招屈之義

事見
圖經

沅江五月平隄流邑人相將浮綵舟靈均何年歌已
矣哀謠振楫從此起揚枹擊節雷闐闐亂流齊進聲
轟然蛟龍得雨鬚鬣動螭煉飲河形影聯刺史臨流
褰翠帟揭竿命爵分雄雌先鳴餘勇爭鼓舞未至銜

枚顏色沮百勝本自有前期一飛由來無定所風俗
如狂重此時縱觀雲委江之湄綵旗夾岸照鮫室羅
襪陵波呈水嬉曲終人散空愁莫招屈亭前水東注
隄上行三首

酒旗相望大隄頭隄下連檣隄上樓日莫行人爭渡
急槳聲幽軋滿中流

江南江北望烟波入夜行人相應歌
柁葉傳情竹枝怨水流無限月明多

長隄繚繞水裴回酒舍旗亭次第開
日晚上簾招估客軻我大編落颿來

采菱行遊于馬湖薄言采之歸以御客古
有采菱曲罕傳其詞故賦之以俟采詩者

白馬湖平秋日光紫菱如錦綵鴛翔盪舟遊女滿中
央采菱不顧馬上郎爭多逐暎紛相向時轉蘭橈破
輕浪長鬢弱袂動參差釵影釧文浮蕩漾笑語哇咬
頽晚暉蓼花緣岸扣船歸歸來共到市橋步野蔓繫
船萍滿衣家家竹樓臨廣陌下有連檣多估客攜觴
薦菱夜經過醉蹋大隄相應歌屈平祠下沅江水月
照寒波白烟起一曲南音此地聞長安北望三千里

秋風引

何處秋風至蕭蕭送鴈群朝來入庭樹孤客最先聞
莫傴歌

莫傴自生長名字無符籍市場雜鮫人婚姻通木客
星居占泉眼火種開山脊夜渡千仞谿含沙不能射

蠻子歌

蠻語鉤輶音蠻衣斑斕布熏狸掘沙鼠時節祠盤瓠
忽逢乘馬客恍若驚鷹顧腰斧上高山意行無舊路

洞庭秋月行

洞庭秋月生湖心曾波萬頃如鎔金孤輪徐轉光不

定遊氣蒙蒙滿寒鏡是時白露三秋中湖平月上天
地空岳陽城頭莫角絕蕩漾已過君山東山城蒼蒼

夜寂寂水月逶迤繞城白盪漿巴童歌竹枝連櫓估
客吹羌笛勢高夜久陰力全金氣肅肅開清躔浮雲
野馬歸四裔首冠星斗當中天天雞相呼曙霞出歛
影含光讓朝日日出喧喧人不閑夜來清景非人間

蹋歌詞四首

春江月出大隄平隄上女郎連袂行唱盡新詞歡不
見紅霞映樹鷓鴣鳴

柰溪柳陌好經過鐙下妝成月下歌為是襄王故宮
地至今猶自細腰多

新詞宛轉遞相傳振袖傾鬟風露前月落烏蹄雲雨
散遊童陌上拾花鈿

日莫江南聞竹枝南人行樂北人悲自從雪裏唱新
曲直到三春花盡時

華清詞

日出驪山東裴回照溫泉樓臺影玲瓏稍稍開白烟
言昔太上皇常居此祈年風中聞清樂往往來列仙
翠華入五雲紫氣歸上玄哀哀生人淚泣盡弓劍前
聖道本自我凡情徒顯然小臣感玄化一望青冥天

步虛詞二首

阿母種桃雲海際花落子城二千歲海風吹折最繁
枝跪捧瓊盤獻天帝

華表千年一鶴歸凝丹為頂雪為衣星星仙語人聽
盡卻向五雲翻翅飛

桃源行

漁舟何招招浮在武陵水拈綸擲餌信流去誤入桃
源行數里清源尋盡花綿綿蹋花覓逕至洞前洞門
蒼黑烟霧生暗行數步逢虛明俗人毛骨驚仙子爭
來致詞何至此須臾皆破冰雪顏笑言委曲問人間
因嗟隱身來種玉不知人世如風燭蓬羞石髓勸客

餐鐙藝松脂留客宿雞聲犬聲遙相聞曉光葱籠開
五雲漁人振衣起出戶滿庭無路花紛紛翻然恐迷
鄉縣處一息不肯桃源住桃花滿溪水似鏡塵心如
垢洗不去仙家一出尋無蹤至今水流山重重

魏宮詞二首

日晚長秋簾外報望陵歌舞在明朝添鑪火欲熏衣
麝憶得分明不忍燒

日映西陵松栢枝下臺相顧一相思朝來樂府長歌
曲唱著君王自作詞

阿嬌怨

望見歲難舉翠華試開金屋埽庭花
湏臾宮女傳來信言幸平陽公主家

九華山并引

九華山在池州青陽縣西南九峯競秀神采奇異昔
予仰太華以為此外無奇愛女几荆山以為此外無
秀及今見九華始悼前言之容易也惜其地偏且遠
不為世所稱故歌以大之

奇峯一見驚魂魄意想洪鑪始開闢疑是九龍天矯
欲攀天忽逢霹靂一聲化為石不然何至今悠悠億
萬年氣勢不死如騰仝音蒸輕舉兒雲含幽兮月添冷日

疑輝兮江漾影結根不得要路津迥秀長在無人境
軒皇封禪登云亭大禹會計臨東溟乘標山力追反不
來廣樂絕獨與猿鳥愁青熒君不見敬亭之山黃索
漠兀如斷岸無稜角宣城謝守一首詩遂使名聲齊
五岳九華山九華山自是造化一尤物焉能籍甚乎
人間

送春曲

春向晚春晚思悠哉風雲日已改花葉自相催漠漠
空中去何時天際來

春已暮冉冉如人老映葉見殘花連天是青草可憐
桃與李從此同桑棗

春景去此去何時回遊人千萬恨落日高臺寂寞
繁花盡流鶯歸不來

初夏曲三首

銅壺方促夜斗柄暫南回稍嫌單衣重初憐北戶開
西園花已盡新月為誰來

時節過繁華陰陰千萬家禽命子戲園果墜枝斜
寂寞孤飛蝶窺叢覓晚花

綠水風初暖青林露草晞麥田雉朝雒桑野人莫歸
百舌悲花盡無聲來去飛

柳花詞三首

開從綠條上散逐香風遠故取花落時悠揚占春晚
輕飛不假風輕落不委地撩亂舞晴空發人無限思
晴天黯黯雪來送青春莫無意似多情千家萬家去
昨來樓上迎春處今日登樓又送歸蘭葉殘妝含露
泣柳條長袖向風揮佳人對鏡容色改楚客臨江心
事違萬古至今同此恨無如一醉盡忘機

秋詞二首

自古逢秋悲寂寥我言秋日勝春朝晴空一鶴排雲
上便引詩情到碧霄

山明水淨夜來霜數樹深紅出淺黃試上高樓清入
骨豈知春色嗾人狂

劉賓客文集卷第二十六
劉賓客文集卷第二十七

樂府下

秦娘歌并引

秦娘本常尚書家主謳者初尚書為吳郡得之命樂工誨之琵琶使之歌且舞無幾何盡得其術居一二歲攜之以歸京師京師多新聲善工於是又捐去故技以新聲度曲而秦娘名家往往見稱於貴遊之間元和初尚書薨於東京秦娘出居民間久之為蘄州刺史張愔所得其後愔坐事謫居武陵郡愔卒秦娘無所歸地荒且遠無有能知其容與執者故日抱樂

器而哭其音焦殺以悲雒客聞之為歌其事以續于
樂府云

秦娘家本閭門西門前綠水環金隄有時妝成好天
氣走上臯橋折花戲風流太守常尚書路傍忽見停
隼換斗量明珠鳥傳意紺憶迎入專城居長髮如雲
衣似霧錦茵羅薦承輕步舞學驚鴻水榭春歌撩上
客蘭堂莫從郎西入帝城中貴遊簪組香簾攏低鬟
緩視抱明月纖指破撥生胡風繁華一旦有消歇題
劍無光履聲絕洛陽舊宅生草萊杜陵蕭蕭松栢哀
妝奩蟲網厚如繭博山鑪側傾寒灰 蘄州刺史張公
字白馬新到銅駝里自言買笑擲黃金月墮雲中從
此始安知鵬鳥坐隅飛寂寞旅魂招不歸秦嘉鏡有
前時結韓壽香銷故篋衣山城少人江水碧斷鴈哀
猿風雨夕朱弦已絕為知音雲鬢未秋私自惜舉目
風煙非舊時夢尋歸路多參差如何將此千行淚更
灑湘江斑竹枝

秋扇詞

莫道恩情無重來人間榮謝遞相催當時初入君懷
袖豈念寒鑪有死灰

搗衣曲

爽砧應秋律繁杵含淒風一一遠相續家家音不同
戶庭凝露清伴侶明月中長裾委襞積輕佩垂瓊瓏
汗餘衫更馥鈿移麝半空報寒驚邊鴈促思聞候蟲
天狼正芒角虎落定相攻盈篋寄何處征人如轉蓬

七夕二首

河鼓靈旗動如娥破鏡斜滿空天是幕徐轉斗為車
機罷猶安石橋成不礙查寧知觀津女竟夕望雲涯
天衢啓雲帳神馭上星橋初喜渡河漢頻驚轉斗杓
餘霞張錦幃輕電閃紅綃非是人間世還悲後會遙

龍陽縣歌

縣門白日無塵土百姓縣前挽魚罟主人引客登大
隄小人縱觀黃犬怒鷓鴣驚鳴逸籬落橘柚垂芳照
窻戶沙平草綠見吏稀寂歷斜陽照懸鼓

度桂嶺歌

桂陽嶺下下復高高人稀鳥獸駭地遠草木豪寄言
千金子知余歌者勞

挿田歌并引

連州城下俯接村墟偶登郡樓適有所感遂書其事
爲俚歌以俟采詩者

岡頭花草齊燕子東西飛田塍望如線白水光參差

農婦白紵帶農夫綠蓑衣齊唱田中歌嬰儻如竹枝
但聞怨響音不辨俚語詞時時一大笑此必相嘲嗤
水平苗漠漠烟火生墟落黃犬往復還赤雞鳴且啄
路傍誰家郎烏帽衫袖長自言上計吏年初離帝鄉
田夫語計吏君家儂定諳一來長安罷眼大不相參
計吏笑致辭長安真大處省門高軻峨儂入無度數
昨來補衛士唯用筒竹布君看二三年我作官人去

畬田作

何處好畬田團團縵山腹鑽龜得雨卦上山燒卧木
驚麇走且顧群雉聲咿啞紅焰遠成霞輕煤飛入郭
風引上高岑獵獵度青林青林望靡靡赤光低復起
照潭出老蛟爆竹驚山鬼夜色不見山孤明星漢間
如星復如月俱逐曉風滅木從敲石光遂致烘天熱
下種煖灰中乘陽圻牙孽蒼蒼一雨後蒼穎如雲發
巴人拱手吟耕耨不關心由來得地勢徑寸有餘陰

蒲槌歌

野田生蒲槌纏繞一枝蒿移來碧墀下張王日日高
分岐浩繁縛脩蔓蟠詰曲揚翹向庭柯意思如有屬
爲之立長架布濩當軒綠米液漑其根理踈看滲漉
繁葩組綬結懸實珠璣蹙馬乳帶輕霜龍鱗躍初旭

有客汾陰至臨堂瞪雙目自言我晉人種此如種玉
釀之成美酒令人飲不足爲君博一斗往取涼州牧

鷓鴣吟

朝陽有吟鳳不聞千萬祀題鳩催衆芳晨間先入耳
秋風白露晞從是爾啼時如何上春日唧唧滿庭飛

牆陰歌

白日左右浮天潢朝晡影入東西牆昔爲兒童在陰
戲當時意小覺日長東隣侯家吹笙簧隨陰促促移
象牀西隣田舍乏糟糠就影汲汲春黃梁因思九州
四海外家家只言牆陰內莫言牆陰數尺間老卻主
人如等閑君看眼前光景促中心莫學太行山

觀雲篇

興雲感陰氣疾走如見機晴來意態行有若功成歸
葱籠含晚景潔白凝秋暉夜深度銀漢漠漠仙人衣

沓潮歌并引

元和十年夏五月終風駕濤南海羨溢南人曰沓潮
也率三更歲一有之余爲連州客或爲予言其狀因
歌之附于南越志

屯門積日無回颿滄波不歸成沓潮轟如鞭石砭且
搖亘空欲駕鼉鼉橋驚湍蹙縮悍而驕大陵高岸失

岩堯四邊無阻音響調背負元氣掀重霄介鯨得性
方逍遙仰鼻嘘吸揚朱翹海人狂顧迭相招蜀衣髻
首聲曉曉征南將軍登巖譙赤旗指麾不敢臨翌日
風回沴氣消歸濤納納景昭昭烏泥白沙復滿海海
色不動如青瑤

百花行

長安百花時風景宜輕薄無人不沽酒何處不聞樂
春風連夜動微雨陵曉濯紅焰出牆頭雪光映樓角
繁紫韻松竹遠黃遶籬落臨路不勝愁輕飛去何託
滿庭蕩魂魄照廡成丹渥欄漫踈顛狂飄零勸行樂
時節易晚晚清陰覆池閣唯有安石榴當軒慰寂寞

春有情篇

為問遊春侶春情何處尋花含欲語意草有鬪生心
雨頻催發色雲輕不作陰縱令無月夜芳興暗中深
路傍曲

南山宿雨晴春入鳳皇城處處聞弦管無非送酒聲

白鷺兒

白鷺兒最高格毛衣新成雪不敵衆禽喧呼獨凝寂
孤眠芊芊草久立潺潺石前山正無雲飛去入遙碧

壯士行

陰風振寒郊猛虎正咆哮徐行出燒地連吼入黃茅
壯士走馬去鎧前彎玉稍叱之使人立一發如鉞交
悍睛忽星墮飛血濺林梢彪炳為我席羶腥充我庖
里中欣害除賀酒紛號呶明日長橋上傾城看斬蛟

邊風行

邊馬蕭蕭鳴邊風滿磧生暗添弓箭力半上鼓鞞聲
襲月寒暈起吹雲陰陳成將軍占氣候出號夜翻營

一作安號
畏翻城

竹枝詞 并引

四方之歌異音而同樂歲正月余來建平里中見
歌竹枝吹短笛擊鼓以赴節歌者揚袂睢舞以曲多
為賢聆其音中黃鍾之羽卒章激訐如吳聲雖僞僂
不可分而含思宛轉有淇濮之豔昔屈原居沅湘間
其民迎神詞多鄙陋乃為作九歌到于今荆楚鼓舞
之故余亦作竹枝詞九篇俾善歌者颺之附于末後
之聆巴歛知變風之自焉

白帝城頭春草生白鹽山下蜀江清南人上來歌一
曲北人莫上動鄉情

山樾紅花滿上頭蜀江春水拍山流花紅易衰似郎
意水流無限似儂愁

江上朱樓新雨晴
灤西春水縠文生
橋東橋西好楊柳
人來人去唱歌行

日出三竿春霧消
江頭蜀客駐蘭橈
憑寄狂夫書一紙
住在成都萬里橋

兩岸山花似雪開
家家春酒滿銀杯
昭君坊中多女伴
永安宮外蹋青來

城西門前澹瀨堆
年年波浪不能摧
懊惱人心不如石
少時東去復西來

瞿唐嘈嘈十二灘
此中道路古來難
長恨人心不如水
等閒平地起波瀾

巫峽蒼蒼烟雨時
清猿啼在最高枝
箇裏愁人腸自斷
由來不是此聲悲

山上層層桃李花
雲間烟火是人家
銀釧金釵來負水
長刀短笠去燒畬

揚柳枝詞九首

塞北梅花羞笛吹
淮南桂樹小山詞
請君莫奏前朝曲
聽唱新翻揚柳枝

南陌東城春蚤時
相逢何處不依依
桃紅李白皆誇好
須得垂楊相發揮

鳳闕輕遮翡翠幃
龍池遙望麴塵絲
御溝春水相暉

映狂殺長安年少兒

金谷園中鶯亂飛
銅駝陌上好風吹
城東桃李湏臾
盡爭似垂楊無限時

花萼樓前初種時
美人樓上鬪香支
如今拋擲長街
裏露葉如啼欲恨誰

場帝行宮汴水濱
數株殘柳不勝春
晚來風起花如
雪飛入宮牆不見人

御陌青門拂地垂
千條金縷萬條絲
如今縮作同心
結將贈行人知不知

城外春風吹酒旗
行人揮袂日西時
長安陌上無窮
樹唯有垂楊管別離

輕盈嫋娜占年華
舞榭妝樓處處遮
春盡絮飛留不
得隨風好去落誰家

浪淘沙詞九首

九曲黃河萬里沙
浪淘風簸自天涯
如今直上銀河
去同到牽牛織女家

洛水橋邊春日斜
碧流輕淺見瓊砂
無端陌上狂風
急驚起鴛鴦出浪沙

汴水東流虎眼文
清淮曉色鴨頭春
君看渡口淘沙
處渡卻人間多少人

鸚鵡舟頭浪颭沙青樓春望日將斜銜泥燕子爭歸
舍獨自狂夫不憶家

濯錦江邊兩岸花春風吹浪正淘沙女郎剪下鴛鴦
錦將向中流定晚霞

日照澄洲江霧開淘金女伴滿江隈美人首飾侯王
印盡是沙中浪底來

八月濤聲吼地來頭高數丈觸山回湏臾卻入海門
去卷起沙堆似雪堆

莫道說言如浪深莫言遷客似沙沈千淘萬灑雖辛
苦吹盡狂沙始到金

流水淘沙不暫停前波未減後波生令人忽憶瀟湘
渚回唱迎神三兩聲

瀟湘神二首

湘水流湘水流九疑雲物至今愁君問二妃何處所
零陵香草露中秋

斑竹枝斑竹枝淚痕點點寄相思楚客欲聽瑤瑟怨
瀟湘深夜月明時

拋毬樂詞二首

五綵繡團圓登君璫瑁筵最宜紅燭下偏稱落花前
上客如先起應須贈一船

春蚤見花枝朝朝恨發遲及看花落後卻憶未開時
幸有拋毬樂一柸君莫辭

楊柳枝詞二首

迎得春光先到來淺黃輕綠映樓臺只緣裊娜多情
思便被春風長請按

巫峽巫山楊柳多朝雲暮雨遠相和因想陽臺無限
事爲君回唱竹枝歌

竹枝詞二首

楊柳青青江水平聞郎江上唱歌聲東邊日出西邊
雨道是無晴還有晴

楚水巴山江雨多巴人能唱本鄉歌今朝北客思歸
去回入紇那披綠羅

紇那曲詞二首

楊柳鬱青青竹枝無限情周郎一回顧聽唱紇那聲
蹋曲興無窮調同詞不同願郎千萬壽長作主人翁
右已上詞先不入集伏緣播在樂章今附于卷末

劉賓客文集卷第二十七

劉賓客文集卷第二十八

送別四十六首

送工部張侍郎入蕃弔祭

時張兼修史

月窟賓諸夏雲官降九天
節終隣好重錫命禮容全
水咽猶登隴沙鳴稍極邊
路因乘驛近志為飲冰堅
毳帳差池見鳥旗搖曳前
歸來賜金石榮耀自編年

蚤秋送臺院楊侍御歸朝

兄弟四人遍歷諸科二人在

仙署棣華春當時已絕倫
今朝丹闕下更入白眉人
重振高陽族分居要路津
一門科第足五府辟書頻
鷲鳥得秋氣法星懸火旻
聖朝寰海靜所至不埋輪

送工部蕭郎中刑部李郎中並以本官兼中丞分命充京西京北覆糧使

霜簡映金章相輝同舍郎天威巡虎落星使出駕行尊俎成全策京坻閱見糧歸來虜塵滅畫地奏明光

送李尚書鎮滑州 自浙西觀察徵拜兵部侍郎月餘有此拜

南徐報政入文昌東郡湏才別建章視草名高同蜀

客擁旄年少勝荀郎黃河一曲當城下緹騎千重照

路傍自古相門還出相如今人望在巖廊 其後果繼韋平之族

送渾大夫赴豐州 自大鴻臚拜家承舊勳

為新詔降恩華又見旌旗出渾家故吏來辭辛屬

國精兵願逐李輕車檀裘君長迎風懼錦領首豪蹋

雪衙其柰明年好春日無人喚看牡丹花

送源中丞充新羅冊立使 侍中之孫

相門才子稱華簪持節東行捧德音身帶霜威辭鳳

關口傳天語到雞林煙開鼇背千尋碧日浴鯨波萬

頃金想見扶桑受恩後一詩西拜盡傾心

送陸侍御歸淮南使府五韻 用年字

江左重詩篇陸生名久傳鳳城來已熟羊酪不嫌羶

歸路芙蓉府離堂璵瑁筵秦山呈臘雪隋柳布新年

曾忝揚州薦因君達短牋 時段丞相鎮揚州嘗辱表薦

送太常蕭博士棄官歸養赴東都

時元兄罷相為

少師仲兄為郎官並分司洛邑

无弟盡鴛鸞歸心切問安貪榮五采服遂挂兩梁冠
侍膳曾調鼎循陔更握蘭從今別君後長向德星看

送王司馬之陝州

自太常丞授工為詩

暫輟清齋出太常空攜詩卷赴甘棠府公既有朝中
舊司馬應容酒後狂案牘來時唯署字風煙入興便
成章兩京大道多遊客每遇詞人戰一場

洛中送楊處厚入關便遊蜀謁韋令公

洛陽秋日正淒淒君去西秦更向西舊學三冬今轉
富曾傷六駟養初齊王城曉入窺丹鳳蜀路晴來見
碧雞蚤識卧龍應有分不妨從此躡丹梯

洛中逢韓七中丞之吳興口號五首

昔年意氣結群英幾度朝回一字行海北天南零落
盡兩人相見洛陽城

自從雲散各東西每日歡娛却慘悽離別苦多相見
少一生心事在書題

今朝無意訴離栝何況清弦急管催本欲醉中輕遠
別不知翻引酒悲來

駱駝橋上蘋風起鸚鵡栝中箬下春水碧山青知好

處開顏一笑向何人
溪中士女出芭籬
溪上鴛鴦避畫旗
何處人間似仙境
春山攜妓採茶時

送周使君罷渝州歸郢州別墅

君思郢上吟歸去
故自渝南擲郡章
野戍岸邊留畫舸
綠蘿陰下到山莊
池荷雨後衣香起
庭草春深綬帶長
只恐鳴騶催上道
不容待得晚菘嘗

發華州留別侍御賈

東簡下延閣
買符驅短轅
同人惜分袂
結念醉芳樽
切切別弦思
蕭蕭征騎煩
臨歧無限意
相視却忘言

張詩云夫子生知者相期
妙理中遂有忘言之句

奉送家兄歸王屋山隱居二首

據道書王屋山一名

陽洛山

陽洛天壇上
依稀似玉京
夜分先見日月淨
遠聞笙雲路
將雞犬丹臺有姓名
古來成道者兄弟亦同行
春來山事好歸去
憶逍遙水淨苔莎色
露香芝朮苗
登臺吸瑞景
飛步翼神颯
願薦墳麓曲
相將學玉簫

送王師魯協律赴湖南使幕

即永穆公之孫

翩翩馬上郎
驅傳渡三湘
橘樹沙洲暗
松醪酒肆香
素風傳竹帛
高價騁琳琅
楚水多蘭若
何人事蹇芳

別友人後得書因以詩贈

前時送君去揮手青門橋路轉不相見猶聞馬蕭蕭
今得出關書行塵日已遙春還遲君至共結芳蘭茗

奉送浙西李僕射相公赴鎮奉送至臨泉驛書禮見徵

杜詩時在汝州

建節東行是舊遊歡聲喜氣滿吳州郡人重得黃丞
相童子爭迎郭細侯詔下初辭温室樹夢中先到景
陽樓自憐不識平津閣遙望旌旗汝水頭

重送浙西李相公頃廉問江南已經七載

後歷滑臺劔南兩鎮遂入相今復領舊地新加旌旄

江北萬人看玉節江南千騎引金鏡鳳從池上遊滄
海鶴到遼東識舊巢城下清波含百谷窻中遠岫列
三茅碧雞白馬回翔久却憶朱方是樂郊

送華陰尉張若赴邕府使幕張即燕公之孫坐事除名

昔忝南宮郎往來東觀頻嘗披燕文傳聳若窺三辰
翊聖崇國本保賢正朝倫高視緬今古清風夏無鄰
蘭錡照通衢一家十朱輪鄴國嗣侯絕為鄉貴業貧
夫子承大名少年振芳塵青袍仙掌下矯首陵煙旻
公治本非罪潘郎一為民風霜苦搖落豎白無緇磷

一旦逢良時天光燭幽淪重為長裾客佐彼觀風臣
分野窮禹畫人煙過虞巡不言此行遠所樂相知新
雨起巫山陽鳥鳴湘水濱離筵出蒼莽別曲多愁辛
今朝一栢酒明日千里人彼此孤舟去悠悠天海春

送湘陽熊判官孺登府罷歸鍾陵因寄呈

江西裴中丞二十三兄

射策志未就從事府云除篋留馬御賦袖有劉弘書
忽見夏木深悵然憶吾廬復持州民刺歸謁專城居
君家誠易知勝絕傾里閭人言壯郭生門有卿相輿
鍾陵藹千里帶郭西江水朱檻照河宮旗亭綠雲裏

前年初缺守慎簡由宸扆臨軒弄郡章得人方付此

是時左馮翊天下第一理貴臣持牙璋優詔發青紙

迎風汚吏免先令疲人喜何武勅腐儒陳蕃禮高士

昔升君子堂腰下綬猶黃中丞時為汾陰有寶氣赤

董多竒鉉束簡下曲臺佩韃來歷陽綺筵陪一笑蘭

室襲餘芳風水忽異勢江湖遂相忘因君儻借問為

話老滄浪中丞為博士製相國柳宜城謚議識者杜

司徒以中丞材譽俱高欲令軍裝以重戎府故授以

本州團練使滿坐觀腰韃禮成驩甚相視而笑後房

尚書屯田員外郎出中踵其武者今給事中穆公代

給事者右丞段公予不佞繼

送常秀才道冲赴制舉

驚禽一辭巢棲息無少安秋扇一離手流塵蔽霜紈
故侶不可追涼風日已寒遠逢杜陵士別盡平生歡
逐客無印綬楚江多芷蘭因君時暇遊長缺不復彈
閱書南軒霽絙瑟清夜闌萬境身外寂一梧腹中寬
伊昔玄宗朝冬卿冠鴛鸞肅穆升內殿從容領儒冠
游夏無措詞陽秋垂不刊至今群玉府學者空縱觀
世人希德門揭若攀峯巒之子向明訓鏘如振琅玕
一旦西上書斑裳拂征鞍荆臺宿暮雨漢水浮春瀾
君門起天中多士如星攢烟霞覆雙闕林舞羅千官
清漏滴銅壺仙厨下雕槃熒煌仰金榜錯落飛濡翰
古來長策人所歎遭時難一鳴從此始相望青雲端

送李策秀才還湖南因寄幕中親故兼簡

衡州呂八郎中

深春風日淨爭長幽鳥鳴僕夫前致辭門有白面生
攝衣相問訊解帶坐南榮端志見眉睫苦言發精誠
因出懷中文調孤詞亦清悄如促柱弦掩抑多不平
乃言本蜀士世降岷山靈前人秉懿文高視來上京
曳綬司徒府所從信國楨析薪委空林善響難繼聲
何處翳附郭幾人思邨城雲天望喬木風水悲流苹

前與計吏西始列貢士名森然就筆札從試春官卿
帝城岐路多萬足伺晨星茫茫風塵中工拙同有營
寒女勞夜織山苗榮寸莖侯門方擊鍾衣褐誰將迎
弱羽果摧頽壯心鬱怏怏諒無蟠木容聊復蓬累行
昨日訊靈龜繇言利艱貞當求捨拔中必在審已明
誓將息薄遊焦思窮筆精蒔蘭在幽渚安得揚茶馨
曰余摧落者散質負華纓一聆苦辛詞再動伊鬱情
身棄言不重愛才心尚驚恨無羊角風使爾化北溟
論罷情益親涉旬忘歸程日攜邑中客閑眺江上城
晝渴命金壘宵談轉璿衡蕙風香塵尾月露濡椀笙

忽被戒羸驂薄言事南征火雲蔚千里旅思浩已盈
湘江含碧虛衡嶺浮翠晶豈伊山水異適與人事并
油幕似崑丘粲然疊瑤瓊庾樓見清月孔坐多綠醴
復有衡山守本自雲龍庭至和在靈府發越侔咸英
一麾出營陽惠彼咄咄氓隼旟舜瀟水居者皆涕零
惟昔與伊人交歡在夙齡一從雲雨散滋我鄙恹萌
北渚不堪愁南音誰復聽離憂若去水浩漾無時停
嘗聞祝融峯上有神禹銘古石琅玕姿祕文螭虎形
聖功莫遠服神物擁休禎賢人在其下仿佛疑蓬瀛
君行歷郡齋大袂拂雙旌飾容遇朗鑒肝鬲可以呈

昔日馬相如臨邛坐盡傾勉君刷羽翰蚤取凌青冥

送張盥赴舉

并引

古人以偕受學為同門友今人以偕升名為同年友其語熟見搢紳者皆道焉余於張盥為丈人由是道也曩吾見爾之始生以老成為祝今吾見爾之成人以未立為憂吾不幸嚮所謂同年友當其盛時聯袂齊鑣亘絕九衢若屏風然今來落落如曙星之相望借曰會合不煩異席可長太息哉然而尚書右丞衛大受兵部侍郎武庭碩二君者當時偉人咸萬夫之望足以訂十朋之多也第如京師無騷騷爾無忤忤爾時秋也吾為若叩商之謳幸有感夫二君子

爾生始懸弧我作坐上賓引箸舉湯餅祝詞天麒麟今成一丈夫坎軻愁風塵長裾來謁我自號廬山人道舊與撫孤悄然傷我神依依見眉睫嘿嘿含悲辛永懷同年友追想出谷晨三十二君子齊飛陵煙旻曲江一會時後會已彫淪况今三十載閱世難重陳盛時一已過來者日日新不如搖落樹重有明年春火後見琮璜霜餘識松筠肅機乃獨秀武部亦絕倫爾今持我詩西見二重臣成賢必念舊保貴在安貧清時為清郎氣力侔陶鈞乞取斗升水因之雲漢津

送裴處士應制舉

晉人裴昌禹讀書數千卷於周官小戴禮尤邃性是
古敢言雖侯王不能卑下故與世相參差凡抵有位
以索合行天下幾戶依反通常歎諸侯莫可遊欲一見
天子而未有路會今年詔書徵賢良昌禹大喜以為
盡可以豁平生搏髀爵躍曰一觀雲龍庭足矣繇是
裹三月糧而西徂咨余以七言為西遊之資藉耳
裴生久在風塵裏氣勁言高少知己注書曾學鄭司
農歷國多於孔夫子往年訪我到連州無窮絕境終
日遊登山雨中試蠟屐入洞夏裏披貂裘白帝城邊
又相遇斂翼三年不飛去忽然結束如秋蓬自稱對
策明光宮人言策中說何事掉頭不答看飛鴻彤庭
翠松迎曉日鳳銜金榜雲間出中貴腰鞭立傾酒宰
臣委佩觀搖筆古稱射策如彎弧一發偶中何時無
由來草澤無忌諱努力滿挽當雲衢憶得童年識君
處嘉禾驛後聯牆住垂釣鬪得王餘魚蹋芳共登蘇
小墓此事今同夢想間相看一笑且開顏老大希逢
舊鄰里為君扶病到方山

和州送錢侍御自宣州幕拜官便於華州

觀省

五綵繡衣裳當年正相稱春風舊關路歸去真多興

蘭陔行可採蓮府猶回瞪楊家紺纒迎侍御即王相公貴婿謝

守瑾華贈宣州崔相公御街草泛濫臺柏烟含凝曾

是平昔遊無因理歸乘味香一笑且開醉笑大帝

長安舊遊四十載鄂渚一別十四年後來富貴已零

落歲寒松栢猶依然初逢貞元尚文主雲關天池共

翔舞相看却數六朝臣屈指如今無四五夷門天下

之咽喉昔時往往生瘡疣聯翩舊相來鎮壓四海吐

納皆通流久別凡經幾多事何由說得平生意千思

萬慮盡如空一笑一言真可貴世間何事最殷勤白

頭將相逢故人功成名遂會歸老請向東山為近隣

送令狐相公自僕射出鎮南梁

夏木正陰成戎裝出帝京沾襟辭闕淚回首別鄉情

雲樹裊中路風烟漢上城前旌轉谷去後騎蹋橋聲

久須駕行重無嫌虎綬輕終當提一筆再入副蒼生

送趙中丞自司金外郎轉官參山南令狐

僕射幕府趙氏兄弟皆僕射門客

綠樹滿裊斜西南蜀路賒驛門臨白社縣道過黃花

相府開油幕門生逐絳紗行看布政後還從入京華

奉送裴司徒令公自東都留守再命太原

本封晉國公兩任相去十六年

星使出關東兵符賜上公山河歸舊國管籥換離宮
行色旌旗動軍聲鼓角雄慶棠餘故吏騎竹見新童
漢壘三秋靜胡沙萬里空其如天下望旦夕詠清風
奉送李戶部侍郎自河南尹再除本官歸

闕

昔年內署振雄詞今日東都結去思宮女猶傳洞簫
賦國人先詠衮衣詩華星却復文昌位別鶴重歸太
池想到金門待通籍一時驚喜見風儀

送蘄州李郎中赴任

楚關蘄水路非賒東望雲山日夕佳薤葉照人呈夏
簞松花滿盃試新茶樓中飲興因明月江上詩情為
晚霞北地交親長引領蚤將玄鬢到京華

洛中春末送杜錄事赴蘄州

尊前花下長相見明日忽為千里人君過午橋回首
望洛城猶自有殘春

夜宴福建盧侍御宅因送之鎮

暫駐旌旗洛水隄綺筵紅燭醉蘭闈美人美酒長相
逐莫怕猿聲發建溪

洛中送崔司業使君扶侍赴唐州

綠野方城路殘春柳絮飛風鳴驪驪馬日照老萊衣
洛苑魚書至江村鴈戶歸相思望淮水雙鯉不應稀
送河南皇甫少尹赴絳州

祖帳臨周道前旌指晉城午橋群吏散亥字老人迎
詩酒同行樂別離方見情從茲洛陽社吟詠欠書生

送前進士蔡京赴學究科

時舊相楊尚書掌選

耳聞戰鼓帶經鋤振發名聲自里閭已是世間能賦
客更攻憲下絕編書朱門達者誰能識絳帳諸生盡
不如幸遇天官舊丞相知君無翼上空虛

送唐舍人出鎮閩中

暫辭鴛鴦出蓬瀛忽擁貔貅鎮粵城閩嶺夏雲迎皂
蓋建溪秋樹映紅旌山川遠地由來好富貴當年別
有情了却人間婚嫁事復歸朝右作公卿

送盧處士歸嵩山別業

世業嵩山隱雲深無四鄰藥鑪燒姹女酒甕貯賢人
曉日華陰霧秋風函谷塵送君從此去鈴閣少談賓

送李友路秀才赴舉

誰憐相門子不語望秋山生長統綺內辛勤筆硯間
榮親在名字好學棄官班佇俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣
萼謝庭歸去蹋芝蘭山頭花帶烟嵐晚棧底江涵雪
水寒伯仲到家人盡賀柳營蓮府遞相歡

送李二十九兄負外赴邠寧使幕

家襲韋平身業文素風清白至今貧南宮通籍新郎
吏西候從戎舊主人城外草黃秋有雪烽頭煙靜虜
無塵鼎門為別霜天晚賸把離觴三五巡

送分司陳郎中祗召直史館重修三聖實

錄

蟬鳴官樹引行車言自成周赴玉除遠取南朝貴公
子重修東觀帝王書常時載筆窺金匱暇日登樓到
石渠若問舊人劉子政如今頭白在商於

送李中丞赴楚州

緹騎朱旗入楚城士林皆賀振家聲兒童但喜迎賢
守故吏猶應記小名萬頃水田連郭秀四時煙月映
淮清憶君初得崑山玉同向揚州攜手行

送李庚先輩赴選

一家何啻十朱輪諸父雙飛秉大鈞曾脫素衣參幕
客却為精舍讀書人離筵洛水侵栝色征路函關向

晚塵今日山公舊賓主知君不負帝城春

送廖參謀東遊二首

九陌逢君又別離行雲別鶴本無期望嵩樓上忽相
見看過花開花落時
繁花落盡君辭去綠草垂楊引征路東道諸侯皆故
人留連必是多情處

送從弟郎中赴浙西并引

從弟三復十餘年間凡三為浙右從事往年主公入
相薦歟登朝中復從公鎮南未幾而罷昨以尚書外
郎奉使至洛旋承新命改轅而東三從公皆在舊地
徵諸故事夙無其倫故賦詩贈之亦志異也

銜命出尚書新恩換使車漢庭無右者梁苑重歸歟
又食建業水曾依京口居劉前軍傳云本京口人世家京口共經何限
事實主兩如初

劉賓客文集卷第二十八

劉賓客文集卷第二十九

送僧二十四首

贈別君素上人并引

曩予習禮之中庸至不勉而中不思而得愜然知聖人之德學以至于無學然而斯言也猶示行者以室廬之奧耳求其徑術而布武未易得也晚讀佛書見大雄念物之普級寶山而梯之高揭慧火巧鎔惡見廣踈便門旁東邪徑其所證入如舟沿川未始念於前而日遠矣夫何勉而思之邪是余知突音奧與於中庸啓鍵關於內典會而歸之猶初心也不知予者謂

予困而後援佛謂道有二焉夫悟不因人而在心而已
其證也猶啻人之享太牢信知其味而不能形於言
以聞于耳也口耳之間兼寸耳尚不可使聞它人之
不吾知宜矣開士君素偶得予於所親一麻棲草千
里來訪素以道眼視予予以所視視之不由陞級攜
手智地居數日告有得而行乃為詩以見志云
窮巷唯秋草高僧獨扣門相歡如舊識問法到無言
水為風生浪珠非塵可昏去來皆是道此別不銷魂

送深法師遊南岳

上人奉在資聖寺

師在白雲鄉名登善法堂十方傳句偈八部會壇場

飛錫無定所寶書留舊房唯應銜草鴈相送至衡陽

廣宣上人寄在蜀與韋令公唱和詩卷因

以令公手札答詩示之

碧雲佳句久傳芳曾向成都住草堂振錫常過長者
宅披文猶帶令公香一時風景添詩思八部人天入
道場若許相期同結社吾家本自有柴桑

送僧仲制東遊兼寄呈靈澈上人

釋子道成神氣閑住持曾上清涼山晴空禮拜見真
像金毛五髻卿雲間西遊長安隸僧籍本是門前曲
江碧松間白月照寶書竹下香泉灑瑤席前時學得

經論成奔馳象馬開禪窟高筵談柄一麾拂講下聽
徒如醉醒舊聞南方多長老次第來入荆門道荆州
本自重彌天南朝塔廟猶依然宴坐東陽枯樹下經
行居止故臺邊忽憶遺民社中客為我衡陽駐飛錫
講罷同尋相鶴經閑來共蠟登山屐一旦揚眉望沃
州自言王謝許同遊憑將雜擬三十首寄與江南湯
慧休

送僧元嵩南遊 并引

予策名二十年百慮而無一得然後知世所謂道無
非畏途唯出世間去可盡心耳繇是在席視者多

行反胡四句之書備將迎者皆赤頰白足之侶采入

智地靜通還源客塵觀盡妙氣來宅內視曾中猶煎

鍊然開士元嵩姓陶氏本丹陽居家世有人爵不藉

其資於毗尼禪那極細牢之義於中後日習總持之

門妙音奮迅願力昭荅雅聞予事佛而佞亟來相從

或問師隳形之自對曰小失怙恃推棘心以求上乘

積四十年有羸老將至而不懈始悲浚泉之有洌今

痛防墓之未遷塗芻莫備薪火恐滅諸相皆離此心

長懸雖萬性歸佛盡為釋種如何入海無復水名然

其一切智者豈遺百行求無量義者寧容斷思今聞

南諸侯雅多大士思扣以苦調而希其未光無容至
前有足悲者予聞是說已力不足而悲有餘因為詩
以送之庶乎踐霜露者聆之有惻

寶書翻譯學初成振錫如飛白足輕彭澤因家凡幾
世靈山預會是前生傳鐙已寤無為理濡露猶懷罔
極情從此多逢大居士何人不願解珠璣

送如智法師遊辰州兼寄許評事

前日過蕭寺看師上講筵都人禮白足施者散金錢
方便無非教經行不廢禪還知習居士發論待彌天

贈長沙讚頭陀

外道邪山千萬重真言一發盡摧峯有時明月無人
夜獨向昭潭制惡龍

送慧則法師上都因呈廣宣上人并引師
情淨名經

佛示滅後大弟子演聖言而成經傳心印曰法承法
而能專曰宗由宗而分教曰友坐而攝化者勝義皆
空之宗也行而宣教者摧破邪山之友也釋子慧則
生於像季思濟劫濁乃學於一友開彼群迷以為盡
妙理者莫如法門變凡夫者莫如佛土悟無染者莫
如散花故業于淨名深達實相自京師涉漢沔歷鄢
郢登熊湘聽徒百千耳感心化法無住道行而歸願

予有社內之因故言別之日愛緣瞥起時也秋盡詠
江淹雜擬以送之前見宣上人為我多謝

昨日東林看講時都人象馬蹋瑠璃雪山童子應前
世金粟如來是本師一錫言歸九城路三衣曾拂萬
年枝休公久別如相問楚客逢秋心更悲

秋日過鴻舉法師寺院便送歸江陵并引

梵言沙門猶華言去欲也能離欲則方寸地虛虛而
萬景入入必有所泄乃形乎詞詞妙而深者必依于
聲律故自近古而降釋子以詩聞于世者相踵焉因
定而得境故儼然以清由慧而遣詞故粹然以麗信
禪林之藹萼而誠河之珠璣耳初鴻舉學詩於荆郢
間私試竊詠發於餘習蓋榛楛之翠羽弋者未之眄
焉今年至武陵二千石始竒之有起予之歎以方袍
親絳紗者十有餘旬繇是名稍聞而執愈變閏八月
余步出城東門謁仁祠而鴻舉在焉與之言移時因
告以將去且曰貧道雅聞東諸侯之工為詩者莫若
武陵今幸承其話言如得法印寶山之下宜有所持
豈徒衣襪之中衆花而已余聞是說乃叩商而吟成
一韋韋八句郡守以坐嘯餘詠激清徵而應之師其
行乎足以資一時中之學矣

看畫長廊遍尋僧一徑幽小池兼鶴淨古木帶蟬秋
客至茶煙起禽歸講席收浮杯明日去相望水悠悠

重送鴻舉赴江陵謁馬逢侍御

西北秋風彫蕙蘭洞庭波上碧雲寒茂陵才子江陵
住乞取新詩合掌看

送僧方及南謁柳負外并引

九江僧方及既出家依匡山一時中頗屬詩以攄思
古詩人暨今號為能賦有輒求其詞吟呻之拳拳然
多多益嗜影不出山者十年常登最高峯四望天海
中然有遠遊之志頓錫而言曰神馳而形闕者方內

之徒及吾無方間於何者繇是耳得必目探之意行
必身隨之雲遊鳥虛迹而遠予為連州居無

何而方及至出襪中詩一篇以貺予其詞甚富留一
歲觀其行結矩如教益多之一旦以行日來告且曰
雅聞鳥味之下有賢諸侯願躋其門如蹈十地敢乞
詞以抵之予唯而賦頌其有重請之色起於顏間耳
昔事廬山遠精舍虎溪東朝陽照瀑水樓閣虹霓中
騁望羨游雲振衣若秋蓬舊房閉松月遠思吟江風
古寺歷頭陀竒峯攀祝融南登小桂嶺卻望歸塞鴻
衣襪貯文章自言學雕蟲捨掄念陵屬覆篋圖穹崇

遠郡多暇日有詩訪禪宮石門聳峭絕竹院含空濛
幽響滴巖溜晴芳飄野叢海雲懸颶母山果屬徂公
忽憶吳興郡白蘋正葱龍願言挹風采邈若窺華嵩
桂水夏瀾急火山宵焰紅三衣濡茵露一錫飛煙空
勿謂翻譯徒不為文雅雄古來賞音者樵爨得孤桐
按徂公宜斥賦芋者而越絕書有徠公張衡賦南都
有徠父長嘯之句古文士又云權父繇是而言謂徠
為父
舊矣

贈日本僧智藏

浮栻萬里過滄溟遍禮名山適性靈深夜降龍潭水
黑新秋放鶴野田青身無彼我那懷土心會真如不
讀經為問中華學道者幾人雄猛得寧馨

贈眼醫婆羅門僧

三秋傷望遠終日泣途窮兩目今先暗中年似老翁
看朱漸成碧羞日不禁風師有金篦術如何為發蒙

海陽湖別浩初師并引

瀟湘間無土山無濁水民乘是氣往往清慧而文長
沙人浩初生既因地而清矣故去葷洗慮剔顛毛而
壞其衣居一都之殷易與士會得執外教盡捐苛禮
自公侯守相必賜其清間耳目灌注習浮於性而里
中兒賢適與浩初比者嬰冠帶豸妻子吏得以乘陵

之汨沒天慧不得自奮莫可望浩初之清光於侯門
上坐第自吟羨而已浩初益自多其術尤勇於近達
者而歸之往年之臨賀唁侍郎楊公留歲餘公遺以
七言詩手筆于素前年省柳儀曹于龍城又為賦三
篇皆章書今復來連山以前所得雙南金出於械亟
請余賡之按師為詩頗清而奕棊至第三品二道皆
足以取幸於士大夫宜薰餘習以深入也會吳郡以
山水冠世海陽又以竒甲一州師慕道於泉石宜篤
故攜之以嬉及言旋復引與共載於湖上奕於樹石
間以植沃州之因緣且賦詩具道其事

近郭有殊境獨遊常鮮懽逢君駐緇錫觀白稱林巒
湖滿景方霽野香春未闌愛泉移席近聞石輟棊看
風止松猶韻花繁露晚乾橋形出樹曲巖影落池寒
湘東架險不可四橋山下出泉壑端為池泓別路千嶂
澄可愛都不可遍舉故狀其境以貽好事裏詩情莫雲端它年買山處似此則隳官

觀棊歌送僕師西遊

長沙男子東林師閑讀藝經工奕棊有時凝思如入
定暗覆一局誰能知今年訪余來小桂方袍袖中貯
新勢山城無事愁日長白晝懵懵眠匡牀因君臨局
看關智不覺遲景沈西牆自從山人遇樵子直到開

元王長史前身後身付餘習百變千化無窮已初疑
磊落曙天星次見搏擊三秋兵鴈行布陳衆未曉虎
穴得子人皆驚行盡三湘不逢敵終日饒人損機格
自言臺閣有知音悠然遠起西遊心商山夏木陰寂
寂好處裝回駐飛錫忽思爭道畫平沙獨笑無言心
有適藹藹京城在九天貴遊豪士足華筵此時一行
出人意賭取聲名不要錢

贈別約師并引

荊州人文約市井生而雲鶴性故去葷為浮圖生寤
而證入與南抵六祖始生之墟得遺教甚悉今年訪
余于連州且曰貧道昔浮湘川會柳儀曹謫零陵宅
于佛寺幸聯棟而居者有年繇是時人大士得落耳
界夫聞為見因今日之來曩時之因耳時儀曹牧柳
州與八句贈別

師逢吳興守相伴住禪扁春雨同栽樹秋燈對講經
廬山曾結社桂水遠揚舲話舊還惆悵天南望柳星
送鴻舉師江南并引

始余謫朗州爾時是師振麻衣斐然而前持文篇以
為僧贊唧唧而清如蟲吟秋自然之響無有假合有
足佳者故為賦二章以聲之距今今年遇于建平赤頰

益蕃文思益深而內外學益富既訊已探穢中出前
所與詩閱之紙勞墨瘁與我同來因思夫苒苒之光
渾渾之輪時而言有初中後之分日而言有今昨明
之稱身而言有幼壯艾之期乃至一警欬一彈指中
際皆具何必求三生以異身邪然而視余之文昔與
今有莛楹之別視余之書昔與今有鈞石之懸視余
之仕昔與今乃唯阿之差耳豈有工拙之數存乎其
間哉蓋可勉而進者與日月而至矣彼儻來外物雖
日月無能至焉是歲師吉余遊江西復為賦七言以
為遊地爾

禪客學禪兼學文出山初似無心雲從風卷舒來處
處繚繞巴山不得去山州古寺好閑居讀盡龍王宮
裏書使君灘頭揀石硯白帝城邊尋野蔬忽然登高
心瞥起又欲浮杯信流水烟波浩淼魚鳥情東去三
千三百里荆門破斷無盤渦湘平漢闊清光多廬山
霧開見瀑布江西月淨聞漁歌鍾陵八部多名守半
是西方社中友與師相見便談空想得高齋師子吼

送霄韻上人遊天台

曲江僧向松江見又道天台看石橋鶴戀故巢雲戀
岫比君猶自不逍遙

送義舟師卻還黔南并引

黔之鄉在秦楚為爭地近世人多過言其幽荒以談笑聞者又從而張皇之猶夫束蘆逐原燎或近乎語妖適有沙門義舟道黔江而來能畫地為山川及條其風俗纖悉可信且曰貧道以一錫遊它方衆矣至黔而不知其遠始遇前節使而聞今節使益賢而文故其佐多才士摩圍之下曳裾秉筆彬彬然與兔園同風蕃僧以外學嗜篇章時或攝衣為末至客其來也約主人乘秋風而還今乞詞以颺之如捧意珠行住坐卧知相好耳余曰唯命筆為七言以應之

黔江秋水浸雲霓獨泛慈航路不迷
猿狖窺齋林葉動蛟龍聞呪浪花低
如蓮半偈心常悟問菊新詩手自攜
常說摩圍似靈鷲卻將山屐上丹梯

送景玄師東歸并引

廬山僧景玄袖詩一軸來謁往往有句輕而道如鶴雛襍從未有六翻而步舒視遠戛然一咲乃非泥滓間物獻詩已斂械而辭且曰其來也與故山秋為期夫丐者僧事也今無它請唯文是求故賦一篇以代瓔珞耳

東林寺裏一沙彌心愛當時才子詩
山下偶隨流水

出秋來卻赴白雲期灘頭躡屐挑沙菜路上停舟讀
古碑想到舊房拋錫杖小松應有過檐枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲
徒侶問新事烟雲含別情應誇乞食處蹋遍鳳凰城

送惟良上人并引

以貌窺天者曰乾然徒單于然而高以數迎天者曰
其用四十有九天果以有形而不能脫乎數立象以
推莢既成而遺之古所謂神交造物者非空言耳軒
皇受天命其佐皆聖人故得之惟唐繼天德如黃帝

有外臣一行亦聖之徒與刊曆考元書成化去今丹
徒人惟良生而能知非自外來以乾坤之莢當十期
之數凝神運指上感躔次視玄黃溟滓無倪有常絕
機泯知獨以神會數起於復之初九音生乎黃鍾之
宮積微本隱言與化合夫天人之數極而含變變而
靡不通神趨鬼懼不足駭也惟良得一行之道故亦
慕其為外臣謬謂余為世間聰明子子來訪初以說
合至于不言言息而理冥復申之以嗟歎曰師其庶
幾乎信神與之而不能測神之所以付信術通之而
不能知術之所以淺哉余聞乎曾井蛙醢雞之不若

也長慶四年冬十一月甲子語至夜艾遂為詩以誌
高齋灑寒水是夕山僧至玄牝無關鎖瓊書捨文字
鐙明香滿室月午霜凝地語到不言時世間人盡睡

送元簡上人適越

孤雲出岫本無依勝境名山即是歸久向吳門遊好
寺還思越水洗塵機浙江濤驚師子吼稽嶺峯疑靈
鷲飛更入天台石橋路垂珠璀璨拂三衣

送宗密上人歸南山草堂寺因詣河南尹

白侍郎

百習俗來得慧根多聞第一卻忘言自從七祖傳心
印不要三乘入便門東泛滄江尋古跡西歸紫閣出
塵喧河南白尹大檀越好把真經相對翻

劉賓客文集卷第二十九

劉賓客文集卷第三十

哀挽悲傷三十八首

德宗神武孝文皇帝挽歌二首

出震清多難乘時播大鈞操弦調六氣揮翰動三辰
運偶升天日哀深率土人瑤池無轍跡誰見屬車塵
鳳翼擁銘旌威遲異吉行漢儀陳祕器楚挽咽繁聲
駐紵辭清廟凝笳背直城唯應留內傳知是向蓬瀛

敬宗睿武昭愍孝皇帝挽歌三首

寶曆方無限仙期忽有涯事親崇漢禮傳聖法殷家
晚出芙蓉闕春歸棠棣華玉輪今日動不是畫雲車

任賢勞憂寐登位富春秋欲遂東人幸寧虞杞國憂
長楊收羽騎太液泊龍舟唯有衣冠在年年愴月遊
講學金華殿親耕鉤盾田侍臣容諫獵方士信求仙
虹影俄侵日龍顏不上天空餘水銀海長照夜鐙前

文宗元聖昭獻孝皇帝挽歌三首

繼體三才理承顏九族親禹功留海內殷曆付天倫
調露曲長在秋風詞尚新本支方百代先讓棣華春
月落宮車動風淒儀仗間路唯瞻鳳翥人尚想龍顏
御宇方無事乘雲遂不還聖情悲望處日下西山
享國十五載升天千萬年龍鑣山路遠騎吹禮容全
日下初陵外人悲舊劍前周南有遺老掩淚望秦川
故相國燕國公于司空挽歌二首

彤弓封舊國黑稍繼前功十年鎮南雍九命作司空
池臺樂事盡簫鼓葬儀雄一代英豪氣曉散白揚風
陰山貴公子來葬五陵西前馬悲無主猶帶朔風嘶
漢水青山郭襄陽白銅蹄至今有遺愛日暮人悽悽

重至衡陽傷柳儀曹并引

元和乙未歲與故人柳子厚臨湘水為別柳浮舟適
柳州余登陸赴連州後五年余從故道出桂嶺至前
別處而君沒於南中因賦詩以投弔

憶昨與故人湘江岸頭別我馬狹林嘶君颿轉山滅
馬嘶循故道颿滅如流電千里江離春故人今不見
謫居悼往二首

邑邑何邑邑長沙地卑濕樓上見春多花前恨風急
猿愁腸斷叫鶴病翹趾立牛衣獨自眠誰哀仲卿泣
鬱鬱何鬱鬱長安遠於日終日念鄉關燕來鴻復還
潘岳歲寒思屈平顛顛顏殷勤望歸路無雨即登山
哭呂衡州時余方謫居

一夜霜風彫玉芝蒼生望絕士林悲空懷濟世安人
略不見男婚女嫁時遺草一函歸太史旅墳三尺近
要離朔方徙歲行當滿欲為君刊第二碑

遙傷段右丞

江湖舊遊
南宮交代

江海多豪氣朝廷有直聲何言馬蹄下一旦是佳城

傷桃源薛道士

壇邊松在鶴巢空白鹿閑行舊迹中手植紅桃千樹
發滿山無主任春風

王思道碑堂下作

蒼蒼宰樹起寒烟尚有威名海內傳四府舊聞多故
吏幾人垂淚拜碑前

遙傷丘中丞并引

河南丘絳有詞藻與余同升進士科從事鄴下不幸
遇害故為傷詞

鄴下殺才子蒼忙冤氣凝枯楊映漳水野火上西陵
馬鬣今無所龍門昔共登何人為弔客唯是有青蠅

傷獨孤舍人并引

貞元中余以御史監祠事河南獨孤生始仕為奉禮
郎有事宗廟郊時必與之俱繇是甚熟及余謫武陵
九年間獨孤生仕至中書舍人視草禁中上方許以
宰相元和十年春余祇召抵京師次都亭日舍人疾
不起余聞因作傷詞以為弔

昔別一年少今悲喪國華遠來同社燕不見早梅花
途次敷水驛伏覩華州舅氏昔日行縣題
詩處潛然有感

昔日股肱守朱輪茲地遊繁華日已謝章句此空留
蔓草佳城閉故林棠樹秋今來重垂淚不忍過西州
湖南觀察使故相國袁公挽歌三首

五驅龍虎節一入鳳凰池令尹自無喜羊公人不疑
天歸京兆日葉下洞庭時湘水秋風至淒涼吹素旗
丹旄發江臯人悲鴈亦號湘南罷灰市漢上改詞曹
表墓雙碑立尊名一字褒常聞平楚獄為報里門高

返葬三千里荆衡達帝畿逢人即故吏拜奠盡沾衣
地得青鳥相賓驚白鶴飛五公碑尚在今日亦同歸
代靖安佳人怨二首并引

靖安丞相武公居里名也元和十一年六月公將朝
夜漏未盡三刺騎出里門遇盜薨于墻下初公為郎
余為御史繇是有舊故今守于遠服賤不可以誅又
不得為歌詩聲于楚挽故代作佳人怨以埤于樂府
寶馬鳴珂蹋曉塵魚文匕首犯車茵適來行哭里門
外昨夜華堂歌舞人

東蜀朝天遂不回路人彈指望高臺墻東便是傷心
地夜夜秋螢飛去來

傷愚溪三首并引

故人柳子厚之謫永州得勝地結茅樹蔬為沼泚為
臺榭目曰愚溪柳子沒三年有僧遊零陵告余曰愚
溪無復曩時矣一聞僧言悲不能自勝遂以所聞為
七言以寄恨

溪水悠悠春自來草堂無主燕飛回隔簾惟見中庭
草一樹山榴依舊開

草聖數行留壁壞木奴千樹屬鄰家唯見里門通德
榜殘陽寂寞出樵車

柳門竹巷依依在野草青苔日月多縱有鄰人解吹
笛山陽舊侶更誰過

碧澗寺見元九侍御和展上人詩有三生
之句因以和

廊下題詩滿壁塵塔前松樹已鱗皴古來唯有王文
度重見平生竺道人

傷秦妹行并引

河南房開士前為虞部郎中為余話曰我得善筆人
于長安懷遠里其後開士為赤縣牧容州求國工而
海之藝工而天今年開士遺予新詩有悼佳人之目
顧予知所自也惜其有良妓獲所從而不可久乃為
傷詞以貽開士

長安二月花滿城插花女兒弄銀箏南宮仙郎下朝
晚曲頭駐馬聞新聲馬蹄逶遲心蕩漾高樓已遠猶
頻望此時意重千金輕烏傳消息紺輪迎芳筵銀燭
一相見淺笑低鬟初目成蜀絃錚錚指如玉皇帝弟
子常家曲青牛文梓赤金簧玫瑰寶柱秋鴈行斂蛾
收袂凝清光抽弦緩調怨且長八鸞鏘鏘渡銀漢九
雛威鳳鳴朝陽曲終韻盡意不足餘思悄絕愁空堂
從郎鎮南別城闕樓船理曲瀟湘月馮夷躑躅舞淥

波鮫人出聽停綃梭北池含煙瑶草短萬松亭下清

風滿北池萬松皆秦聲一曲此時聞嶺泉鳴咽南雲

斷來自長陵小市東舜華零落瘴江風侍兒掩泣收

銀甲鸚鵡不言愁玉籠博山鑪中香自滅鏡奩塵暗

同心結從此東山非昔遊長嗟人與弦俱絕

夔州竇負外使君見示悼妓詩願余嘗識

之因命同作

前年曾見兩鬟時今日驚吟悼妓詩鳳管學成知有

籍龍媒欲換歎無期空廊月照常行地後院花開舊

折妓寂寞魚山青草裏何人更立智瓊祠

竇夔州見寄寒食日憶故姬小紅吹笙因

和之

鸞聲窈眇管參差清韻初調衆樂隨幽院妝成花下

弄高樓月好夜深吹忽驚莫槿飄零盡唯有朝雲夢

想期聞道今年寒食日東山舊路獨行遲

傷循州渾尚書

貴人淪落路人哀碧海連天丹旆回遙想長安此時

節朱門深巷百花開

哭龐京兆少年有俊氣嘗擢制科之首

俊骨英才氣褻然策名飛步冠群賢逢時已自致高

位得疾還因倚少年天上別歸京兆府人間空歎茂
陵阡今朝總帳哭君處前日見鋪歌舞筵

再傷龐尹

京兆歸何處章臺空暮塵可憐鸞鏡下哭殺畫眉人

哭王僕射相公

名播時兼
鹽鐵暴薨

于侯一日病滕公千載歸門庭颯已變風物慘無輝
群吏謁新府舊賓沾素衣歌堂忽暮哭賀雀盡驚飛

傷韋賓客

自工部尚
書除賓客

韋公八十餘位至六尚書五福唯無富一生誰得如

桂枝攀景久蘭省出仍初海內時流盡何人動素車

再經故元九相公宅池上作

故池春又至一到一傷情鴈鷺群猶下蛙蟻衣已生
竹叢身後長臺勢雨來傾六尺孤安在人間未有名

劉賓客文集卷第三十